

四庫全書

子部

欽定四庫全書

古今事文類聚前集卷四十三

宋 祝穆 撰

藝術部

博塞

先代反

羣書要語說文云行碁相塞謂之塞鮑宏塞經曰塞有

四采塞四乘五是也至五即格不得行故謂之格五

類要

要世之糾率蒲博者謂之公子家又謂之囊家樗蒲經

云一有賭兩人以上須置囊合依條檢文書了投錢入

囊家亦謂之錄事

唐史

博局戲六著十二碁古者烏曹作

博尹文子曰博盡關塞之宜得周通之路

說文

鮑宏博經

琨蔽王著也各投六著行六碁故云六博用十二六碁

白六碁黑所擲頭謂之瓊瓊有五采刻為一畫者謂之

塞刻為兩畫者謂之白刻為三畫者謂之黑一邊不刻

者五塞之間謂之五塞意錢者何承天纂文曰詭億一

曰射意一曰射數即攤錢也

見

樗蒲經曰凡近關及後

一子謂之塹近關及前一子謂之坑落坑塹非肯米不出凡一馬打一馬如遇退六踏馬則一馬可踏三馬故世指不循理者謂之踏坑塹云

塵史

古今事實

博塞亡羊

臧與穀相與牧羊問臧奚事挾策讀書問穀奚事博塞以遊事業不同亡羊均也

提殺太子

漢吳王濞太子孝文時入見得侍皇太子欲博吳太子師傳皆楚人輕悍博道不恭皇太子引博局提殺吳太子遣其喪歸吳王愠曰死長安即何必來葬復遣喪之長安葬由是怨望

自通博徒

漢袁盎家居與閭里浮湛相隨行鬪雞走狗洛陽劇孟嘗過盎盎善待之安陵富人謂盎曰劇孟博徒將軍何自通之盎曰劇孟雖博徒然母死客送喪車千餘乘此

亦有過人者緩急人所有一旦叩門不以親為解不以
在亡為辭天下所望者唯季心劇孟今公陽從數騎一
旦有緩急寧足恃乎遂罵富人弗與通

格五待詔

吾丘壽王以格五召待詔

製雙陸局

博陸采名也陳思王製雙陸局置骰子二至唐末有葉
子之戲未知誰置遂加骰子至六骰合作投投擲之義

今作骰非聲

譜

南風不競

王子敬數歲時嘗看諸門生擲蒲見有勝負因曰南風不競門生輩輕其小兒迺曰此郎亦管中窺豹時見一班子敬瞋目曰遠慙荀奉倩近愧劉真長遂拂衣而去

牧豬奴戲

見恭門

在艱戲擲

晉袁耽字彥道有才氣倜儻不羈桓溫少時游於博徒

資產俱盡猶有負進思自振之方莫知所出求濟於耽
耽時在艱以誠告焉耽略無難色變服懷布帽隨溫與
債主戲耽素有藝名債者聞之而不相識謂曰卿當不
辨作袁彥道也遂就局十萬一擲直上百萬耽投馬絕
叫以布帽擲地曰竟識袁彥道不其通脫若此

得雉得盧

宋顏師伯為侍中孝武與搏蒲帝得雉大悅謂必勝師
伯後得盧帝失色師伯遽斂手曰幾得盧爾曰師伯一

輸百萬

唱子成盧

宋劉毅字希樂於東府聚博大擲一判應至數百萬
餘人並黑犢以還惟劉裕及毅在後毅次擲得雉大喜
褰衣繞床叫謂同坐曰非不能盧不事此耳裕惡之因
援五枚久之曰老兄試為卿答既而四子俱黑其一子
轉躍未定裕厲聲喝之即成盧毅意殊不快也

本傳

一擲百萬

南史桓玄聞劉毅起兵曰毅家無擔石之儲擣菹一擲
百萬共舉大事何謂無成劉毅家四壁而一擲百萬以
為英雄小遇鵝炙乞丐如奴婢孰謂英雄以一鬻動其心
哉

後山
理究

馬策爛朽

有人山行見洞中二老翁擣菹以馬策拄地觀之俄鞭

爛鞍朽與樵人爛柯事相類

異苑

賭集翠裘

則天時南海貢集翠裘后以賜張昌宗狄仁傑奏事命
與昌宗雙陸則天曰賭何物梁公曰以臣紫絕袍為對
賭昌宗翠裘則天曰此裘價踰千金公曰臣袍乃大臣
朝見之衣翠裘乃嬖倖寵遇之服對臣之袍臣猶怏怏
昌宗沮氣索累局連北公對御褫裘謝恩而出及光
範門遂付家奴衣之從馬而去

集異記

雙陸不勝

見皇
后門

四緋轉敗

飾四以朱者明皇與貴妃采戲將北唯重四可轉敗為
勝上擲連呼叱之骰子宛轉而成重四上大悅命高力
士賜四緋也

事始

判僧賭錢

見僧門

古今文集

雜著

戒博奕論

章曜

吳人

古之志士悼年齒之流邁懼名稱之不立故勉精厲操

經之以歲月累之以日力若甯越之勤董生之篤漸漬
德義之淵棲遲道藝之域勞身苦體契闊勤思是以卜
式立志於耕牧黃霸愛道於園囿山甫勤於夙夜吳漢
不離公門豈其游墮哉今世之人不務經術好翫博奕
至或賭及衣物徙基易行然其所志不出一枰之上所
務不過方罫之間技非六藝用非經國以變詐為務以
劫殺為名而空妨日廢業終無補益今大吳受命務在
得人勇畧之士則受熊虎之任儒雅之徒則處龍鳳之

署士宜勉思至道愛功惜力使名書史籍勲在盟府乃
君子之上務當今之先急也夫一枰之木孰與大國之
封枯棊三百孰與萬人之將今世士移博奕之力用之
於詩書是有顏閔之志也用之於計智是有良平之思
也用之於資貨是有猗頓之富也用之於射御是有將
帥之備也如此則功名立而鄙賤遠矣

書博奕論後

黃魯直

涪翁放逐黔中既無所用心頗喜奕棊紹聖四年八月

丁未偶開常昭博奕論讀之喟然以為真無益於事誠
陶桓公所謂牧猪奴戲耳因自誓不復奕棋自今日以
來不信斯言有如黔江云

觀博

劉禹錫

客有以博戲自任者速

集作遲

余觀焉初主人執握槩之

器寘於廡下曰主進者要約之既揖讓則

集作即

次有博

齒齒異乎古之齒其制用骨觚稜四均鏤以朱墨耦而
合數取應日月視其轉止依以爭道是制也通行之久

矣莫詳所祖以其用必投擲互相博投詔之是日客抵

骨於局且祝之曰其來如趣

集作迎

其去如脫事先趨趨

命中無蹉跌無從彼呼無俾

集作疾

我但分曹適迫自旦

至於日中昃而率與所祝異焉客視骨

集作促

如有情焉

如或憑焉悉詈之不洩又從而齟齬蹂躪之莫顧其十

目之哈讓也乃曰非余術之不工是朽骸者不余畀也

請刷耻於奕棋主人促命燭以續之驚神默計巧竭智

墮主進者書勝負之數于牘視其所喪又倍前籍焉觀

者曰以夫人之褊心亦將詬棋而抵枰矣既乃恬而不
恤赧然有失鵠求身之色人咸異之子劉子曰先人者
制人博投是已從人者制於人枯棋是已二者豈有數
存乎其間哉所處之勢異耳是知當軸者易生嫌而退
身者易為譽易生之嫌不足貶也易為之譽不足多也
在集作亦辨其所處而已

骰子選格序

房千里

開成三年春予自海上北徙舟行次洞庭之陽有風甚

急繫舡野浦下三日遇二三子號進士者以穴骰雙雙
為戲更投局上以數多少為進身職官之差數豐貴而
約賤卒局座客有為尉掾而止者有貴為相臣將臣者
有連得美名而後不振者有始甚微而歛升于上位者
大凡得失酷似前所謂不繫賢不肖但卜其偶不偶耳
達人以生死為勞息萬物為一馬果如是吾今之貴者
安知其不果賤哉彼真為貴者乃數年之榮耳吾今貴
者亦數刻之樂耳雖久促稍異其歸於偶也同列禦寇

叙穆天子夢遊事近者沈拾遺述枕中事彼皆異類微物猶且竊爵位以加人或一瞬為數十歲吾果斯人也又安知數刻之樂果不及數年之榮耶因條所置進身職官遷黜之目為選格序

塞賦

邊孝先

可以代博奕者曰塞其次也試習其術以驚睡救寤絕晝寢之譏而已然而徐核其因通之極乃亦精妙而足美也故書其較畧舉其指歸以明博奕無以尚焉曰始

作塞者其明哲乎故其用物也約其為樂也大猶土鼓
塊枹空桑之瑟質樸之化上古所耽也然本其規模制
作有式四道交正時之則也棊有十二律呂極也人操
厥半六爻列也赤白色者分陰陽也乍亡乍存像日月
也行必正直合道中也趨隅方折禮之容也迭往迭來
剛柔通也周則復始乾行健也局正以平坤德順也然
則塞之為義盛矣大矣廣矣博矣質象于天陰陽在焉
取則于地剛柔分焉施之于人仁義載焉考之古今王

霸備焉覽其成敗為法式焉

古詩

今夕行

杜甫

今夕何夕歲云徂更長燭明不可孤
咸陽客舍一無事相與博塞為歡娛
憑陵大叫呼五白袒跣不肯成臬盧
英雄有時亦如此邂逅豈即非良圖
君莫笑劉毅從來布衣願家無擔石輸百萬

律詩

觀雙陸譜有感

朱元梅

近從新譜識梟盧擬喚安陽舊博徒只恐分陰間過了
更教人誚牧猪奴

詩話

欲見玉纖

張祐杜牧之同燕有屬意者索骰子賭酒牧之微吟曰
骰子遶巡裏手拈無因得見玉纖纖祐應聲曰但知報
道金釵墜髻髻還應露指尖

墮落坑塹

鄭都官詩有能銷永日是擣菹坑塹由來似宦途之句
蓋擣菹所難者在於過關以前後為坑塹畏墮落耳塵史

倡優

覆射雜劇附

羣書要語倡優下賤

賈誼策

不根持論上頗俳優畜之

東方朔傳

古今事實

斬俳優

魯定公十一年夾谷會齊人使優施舞於魯君之幕下

孔子曰笑君者罪當死使司馬行法焉

穀梁

魯定公與齊

侯會於夾谷孔子攝行相事齊宮中之樂俳優儒戲

於前孔子於是斬之

家語

優旃休居

秦優旃始皇置酒天雨陞楯者皆霑寒優旃曰汝欲休
乎皆曰幸甚有頃優旃臨檻大呼曰陞楯郎汝雖長何
益幸雨我雖短也幸休居始皇使得以半相代太史公
曰優旃臨檻疾呼陞楯得以半更豈不偉哉

史記

門高作亂

唐莊宗好優優者郭從謙優名門高為從馬直指揮使明宗入汴莊宗至萬勝不得進還洛欲復東扼汜水其日門高作亂從樓上射中莊宗崩五方人聚樂器焚之傳曰君以此始亦以此終莊宗好伶而弑於門高焚以樂器可不戒哉

譏帥臣貪

王知訓帥宣州入覲賜宴伶倫戲作綠衣人大面如鬼

狀或問何為者荅曰吾宣州土地神問何故到此曰王
知訓入覲和地皮捲來因得至此

南唐近事

武襄優戲

韓魏公言狄青作定副帥一日宴公惟劉易先生與焉
易性素疎訐時優人以儒為戲易勃然謂黥卒敢如此
詬罵武襄不絕口至擲樽俎以起公是時觀武襄意氣
殊自若不少動笑語益溫次日武襄首造易謝公於是
時已知其有量

韓別錄

以儒為戲

至道二年重陽皇太子諸王宴瓊林苑教坊以夫子為
戲賓客李至言於東朝曰唐太和中樂府以此為戲文
宗遽令止之咎伶人以懲其無禮魯哀公以儒為戲尚
不可況敢及先聖乎東朝驚歎曰於上而禁止之此戲

遂絕楊公
談苑

斥慢先聖

孔道輔使契丹燕使者優人以文宣為戲公赧然徑出

虜使主客者邀還坐具令謝之

墓誌

元祐中上元駕幸凝

祥池宴從臣教坊伶人以先聖為戲刑部侍郎孔宗翰
奏唐文宗時嘗有為此戲者詔斥去之今豈宜有此詔
付伶官于理或曰此細事何足言者公曰天子春秋鼎盛
方且尊德樂道賤工乃爾褻慢而不治豈不累聖德
乎聞者嘆服

燕談水

笑不為優

王荊公知常州對客未嘗有笑容一日會客倡優在庭

公忽大笑人頗怪之有客乘間啓公公曰疇昔席上偶思咸常一卦自喜有得不覺發笑耳

遊齋間覽

射蜥蜴寄生

以下係覆射

漢東方朔武帝使諸倡射覆置守宮盆下皆不能中朔自贊曰臣嘗受易請射之乃扞蓍布卦曰臣以為龍又無角謂之為蛇又有足跂跂脉脉善緣壁是非守宮即蜥蜴上曰善賜帛幸倡郭舍人滑稽不窮曰朔狂幸中耳非至數也臣願令朔復射朔中之臣榜百不能中臣

賜帛廼覆樹上寄生令朔射之朔曰是窠數也舍人曰
果知朔不能中也朔曰生肉為膾乾肉為脯著樹為寄
生盆下為窠數上令倡監榜舍人云云

射有酒食

吳趙達嘗過知故知故為具食曰倉卒乏酒般如何達
取盤中隻箸再三縱橫之曰卿東壁下有美酒一斛又
有鹿肉三斤何以辭無主人慙曰知卿善射有無欲相
試耳

射燕蜂蜘蛛

魏管輅館陶令諸葛原遷新興太守輅往餞之原取燕
卵蜂窠蜘蛛著器中使覆射卦成輅曰第一物含氣須
變依乎宇堂雄雌以形翅翼舒張燕卵也第二物家室
倒懸門戶衆多藏精育毒得秋乃化蜂窠也第三物敵
眦長足吐絲成維尋網求食利在昏夜蜘蛛也舉坐驚
喜

射鼠生三子

唐袁客師天網子也高宗置一鼠子于奩令術家射皆曰鼠客師曰雖實鼠然入則一出則四發之鼠生三子

射橘蜂石龜

趙晉公在中書聞丁文果善覆射召至函置一物令文果射文果書四句云太歲當頭坐諸神列四旁其中有
一物猶帶洞庭香發函視之乃用厯日第一幅裏綠橘
一枚也又太宗置一物器中令文果射亦書四句云藹
藹華華山中採花雖無官職一日兩衙啟之乃蜂也又

取一物令射云有頭有足不石即玉欲要縮頭不能入

腹乃壓書石龜也

玉壺清話

平城傀儡

以下係雜劇

傀儡子起漢祖平城之圍其城一面即冒頓妻閼氏兵強於三面陳平訪知閼氏妒忌造木偶人運機關舞埤間閼氏望見謂是生人慮下城冒頓必納遂退軍史家但云秘計鄙其策下耳後翻為戲具引歌舞者白郭郎髭髮善謔笑凡戲場必在俳兒之首

樂府雜錄

吞劍走索

張衡西京賦云烏獲扛鼎都盧尋橦衝狹驚濯胃哭鉗
鋒跳九劍之揮霍走索上而相逢注卷簾席以矛挿其
中伎兒以身投從中過驚濯以盤水置前坐其後踊身
張手跳前以足偶節踰水復却坐如驚之浴也揮霍謂
九劍之形也索上長繩繫兩頭於梁舉其中央兩人各
從一頭上交相度所謂舞絙者也又注狹以草為環挿
刀四邊技人躍入其中胃哭刀上如煙之飛躍水也跳

弄也九鈴也揮霍九劍上下貌

分身吐火

張衡西京賦奇幻倏忽易貌分形吞刀吐火雲霧杳冥
畫地成川流渭通涇注奇幻謂勾人能分一身作數人
或吞刀或吐火或起雲霧或畫地成川河

金刀厭虎

東海人黃公少時能幻制蛇虎常佩赤金刀及衰老飲
酒過度有白虎見於東海黃公以赤刀往厭之術不行

遂為虎所食

掌上舞

梁王侃性豪侈善音律自造採蓮棹歌甚有新致姬妾
列居彈箏陸大喜鹿角爪長七寸舞人張淨琬腰圍一

尺六寸人推能掌上舞

三都賦注

反腰貼地

孫荆玉能反腰貼地銜得席上玉簪梁王侃不飲酒而

好賓游終日獻酬同其醉醒

同上

戒造戲具

工部尚書段綸奏召巧士楊思齊上令試之綸使先造傀儡上曰召巧工庶供國事卿令先造戲具豈百工相戒毋作淫巧之意耶遂削綸籍

古今文集

雜著

傀儡故實

顏之推

或問俗名傀儡子為郭禿有故實乎答曰風俗通云諸

郭皆諱禿當是前世有姓郭而病禿者滑稽調戲故後
人為其象呼為郭禿爾

顏氏
家訓

諫伶人為近侍疏

李綱

臣按周禮均工樂胥不得廁於仕伍雖復才如子野妙
等師襄皆身終子繼不易其業故魏武使禰衡擊鼓衡
先解朝服露體而擊之云不敢以先王法服為伶人之
衣惟齊高緯封曹妙達為王授安馬駒為開府既招物
議大毀彝倫有國有家者以為殷鑒方今新定天下開

太平之業起義功臣行賞未徧高才碩學猶滯草萊而
先令舜胡致位五品鳴玉曳組趨馳廊廡固非創業垂
統貽則子孫之道也

文粹

書三笑圖後

蘇子瞻

近於士人處見石恪畫此圖三人者皆大笑至於冠履
衣服手足皆有笑態其後三小童罔測所謂亦大笑世
言侏儒觀優而笑或問其所見則曰長者豈欺我哉此
畫正類此寫呈欽之兄想亦當捧腹絕倒撫掌盧胡冠

纓索絕也

古詩

險竿歌

顧況

宛陵女兒擘手飛長竿橫空上下走已能輕險若平地
豈肯身為一家婦宛陵將士天下雄一下定却長梢弓
翻身掛影恣騰蹈反綰頭髻盤旋風盤旋風撇飛鳥驚
猿逸樹枝裏裏頭上打鼓不聞時手蹉脚踏蜘蛛絲忽
雷電斷流星尾曜睽劃破蚩尤旗若不隨仙作仙女即

應嫁賊生賊兒中丞方畧通變化外戶不扃從女嫁

險竿行

柳曾

山險驚摧輶水險能覆舟奈何平地不肯立走上百尺
高竿頭我不知爾是人耶復獠耶使我為爾長嘆嗟我
聞孝子不許國忠臣不愛家爾今輕命重黃金忠孝兩
虧徒爾誇始以險伎悅君目終以貪心媚君祿百尺高
竿百度緣一足參差一家哭險竿兒聽我語更有險徒
險於汝重於權者失君恩落向天涯海邊去險竿兒爾

須知險徒欲往爾可思上得不下下得上我謂此輩險
於險竿兒

西涼伎

白居易

西涼伎西涼伎假面胡人假獅子刻木為頭絲作尾金
鍍眼睛銀貼齒奮迅毛衣擺雙耳如從流沙來萬里紫
髯深目羌胡兒鼓舞跳梁前致詞道是涼州未陷日安
西都護進來時須臾云得新消息安西路絕歸不得泣
向獅子雙涕垂涼州陷沒知不知獅子迴頭向西望哀

吼一聲觀者悲真元邊將愛此曲醉坐笑看看不足娛
賓鴛士宴監車獅子胡兒長在目有老征夫年七十見
弄涼州低面泣泣罷斂手白將軍主憂臣辱昔所聞奈
何仍看涼州伎取笑恣歡無所愧縱無智力未能收忍
取西涼弄為戲

擬寒山拾得

王介甫

傀儡抵一機種種沒根栽被我入棚中昨日親看來方
知棚外人擾擾一場歎終日受伊謾更被索錢財

律詩

窟磊子人

梁鎰

刻木牽絲作老翁，雞皮鶴髮與真同。須臾弄罷寂無事，

還似人生一世中。

英華

傀儡

楊大年

後山語錄云：語俚而意切，相傳以為笑。

鮑老當筵笑郭郎，笑他舞袖太琅璫。若教鮑老當筵舞，轉更琅璫舞袖長。

傀儡

黃魯直

萬般盡被鬼神戲看取人間傀儡棚
煩惱自無安脚處從他鼓笛弄浮生

上竿伎

晏同叔

石林詩話舊中書南廳壁間題此詩當時
必有謂文潞公在樞府嘗一日過中書與
荆公行至題下特留誦詩久之亦不能無
意也

百尺竿頭裊裊身足騰跟倒駭旁人漢陰有叟君知否
抱甕區區亦未貧


藏獄

夏子喬

丁晉公為玉清昭應宮使夏英公為判官
一日錫宴齋宮優人有雜手藏獄者公顧
英公曰古人無詠藏獄詩請賦一章英公
為一絕云

舞袖挑珠復吐丸遮藏巧便百千般主公端坐無由見

却被旁人冷眼看



古今事文類聚前集卷四十三

欽定四庫全書

子部

古今事文類聚前集卷四十五

詳校官中書_臣康綸鈞

侍讀_臣孫球覆勘

總校官編修_臣王燕緒

校對官中書_臣陸湘

謄錄監生_臣范墉

欽定四庫全書

古今事文類聚前集卷四十四

宋 祝穆 撰

樂生部

生辰

詳見誕子及壽門

同庚附

羣書要語誕彌厥月

主民

乃寢乃興乃占我夢吉夢維何

維熊維羆男子之祥維虺維蛇女子之祥乃生男子載

衣之裳載弄之璋乃生女子載衣之裼載弄之瓦

斯子

生男子設弧於門左

內則

男子生桑弧蓬矢以射天地四

方

射義

山川氣候彰白武於皐繇象緯休徵下蒼龍於曼

倩

盈川集

同庚與吾同物

左

詩句何事共生壬子歲老於崔相及劉郎

白集注予與崔劉同年

紫綬白髭鬚同年二老夫

樂天喜見劉夢得

舊遊到處皆蒼蘚

同甲惟君尚黑頭

坡

古今事實

生空桑中

伊尹生乎空桑注云伊尹母居伊水之上既孕夢有神告之曰白水出而東走無顧明日視白水出告其鄰東走十里而顧視其邑盡為水身因化為空桑有莘氏女子採桑得孕兒於空桑之中故命之伊尹而獻其君令庖人養之長而賢為殷湯相

列子

維嶽降神

嵩高維嶽峻極于天維嶽降神生甫及申維申及甫維

周之翰

紱麟

孔子生之夜有二蒼龍自天而下有二神女擎香霧於空中以沐徵在先是有五老列於庭則五星之精又有麟吐玉書於闕里人家云水精之子系衰周而素王故二龍遶室五星降庭徵在以繡紱繫麟角及夫子將終抱麟解紱而泣

拾遺記

饋鯉

孔鯉生有人饋金鯉

記室新書

陸地生蓮

關令尹喜生時其家陸地自生蓮華光色鮮盛

關令內傳

揆余初度

屈原離騷云帝高陽之苗裔兮朕皇考曰伯庸攝提貞
于孟陬兮惟庚寅吾以降皇覽揆余以初度兮肇錫余
以嘉名名余曰正則兮字余曰靈均紛吾既有此內美
兮又重之以脩能



天星孕秀

蕭何昂星精。張良感弧星生。樊噲感狼星生。李
白之生母夢長庚星。

雌甲辰

裴晉公有遺以槐癭者郎中庾威在坐曰此是雌樹生
者公問郎中年甲對曰與公同是甲辰公笑曰郎中便

是雌甲辰

雞跖

天上麒麟

徐陵字孝穆母臧氏嘗夢五色雲化而為鳳集左肩上
已而誕陵焉時有寶誌上人者世稱其有道陵年數歲
家人攜以候之寶誌手摩其頂曰天上石麒麟也

生丙子

唐張果常言我生堯之丙子歲

小戊子

程文惠與龐公同戊子生程已貴龐尚為小官常戲龐
曰君乃小戊子矣後龐大拜文惠曰今日大戊子却為

小戊子矣

東軒

獨獻范蠡圖

陳恭公判亳州遇生日親戚多獻老人星圖姪世脩獨
獻范蠡遊五湖圖且贊曰賢哉陶朱伯越平吳名遂身
退扁舟五湖公即日納節明年乞致仕

倦遊錄

丞相放生

光祿卿鞏申佞而好進老為省判趨附不已王荊公為
相每遇生日朝士獻詩頌僧道獻功德疏以為壽臯吏

走卒皆籠雀。鵠就宅放之。謂之放生。申不閑詩什。又不能誦經。於是以大籠貯雀鵠。詣客次。搢笏開籠。每放一鵠。雀叩齒祝之曰。願相公一百二十歲時有邊塞之主。妻病而虞侯割股以獻者。天下駭笑。或對曰。虞侯為縣君割股。大卿與丞相放生。

東軒筆錄

悲喜不同

伊川先生曰。人無父母。生日當倍悲痛。更安忍置酒張樂。以為樂。若具慶者可矣。

大宴近駢

寇萊公在藩鎮嘗因生日造山棚大宴又服用僭侈為人所奏上怒甚謂王旦曰寇準每事欲效朕可乎旦徐對曰準誠賢能無如駢何上意解遂不問

同日相賀

以下條同庚

漢高祖與盧綰同日生里中持羊酒賀兩家

本傳

顧悅蒲柳

顧悅與簡文同年而早白簡文問曰卿何以先老答曰

蒲柳之質望秋先零松柏之姿經霜猶茂

世說

同庚齊名

鍾瑾與李膺同年俱有聲名

漢質紀

有無通共

吳周瑜字公瑾舒人初孫堅興義兵策

字伯符

將母從居

舒與瑜同年友善瑜推道南大宅舍策升堂拜母有無
通共

小一月生

曹公責孫權質子張昭等猶豫不能決權引周瑜詣母
前定議權母曰公瑾議是也公瑾與伯符同年小一月
耳汝其兄事之

同年為兄

許遠與張巡同年生月日後於巡呼之為兄

韓愈作
張巡傳

後一日生

史宰于即思明與安祿山先後一日生及長相親愛皆

為互市牙郎

通鑑

同年皆窮

馬正卿字夢得作太學正清苦有氣節余偶至其齋書
杜子美秋風歎一篇初無意也正卿即日辭歸至今白
首窮餓守節如故又曰夢得與僕同歲月生少僕八日
是歲生者無富貴人而僕與夢得為窮之冠即吾二人
而觀之當推夢得為首

東坡志林

同宗同甲

李濬與李宗諤同宗同甲後一日而生平日休戚一同

宗諤死濬後一日卒

王壺清話

同庚俱貴

王仲儀與呂寶臣俱以丁未生申公在相位仲儀三十餘歲龍圖閣待制知渭州時西方有警令三帥選差神龍衛千兵送行更候迓吏騶御之盛前此未有往別申公申公顧左右喚十二郎來

即寶臣也

公曰仲儀今擁千兵

擢帥汝猶為莞庫也仲儀既去申公徐曰汝無羨後十年却於汝手作差遣治平初寶臣擢樞密院副使仲儀

復以端明殿學士為渭帥

間見錄

古今文集

雜著

謝陳提刑壽詩啟

壬戌

周子充

解九夏之齋自恣誤投於憲網校中元之籍長生更擬
於仙曹未瞻使者之繡衣先拜美人之錦段妙甚唐賢
之律申之史克之言何臺治之俶臨為部民而加禮歌
明月之章於赤壁諒因歲日之俱同穆清風之頌於東

方敬祝牡鸞之遄返

一云靈均初度之嘉走無是也魏野中元之句公則過之

謝吳運使壽詩啟

周子充

答其用寇萊公文潞公事渠致仕而歸蓋已卯宣城所解貢士

繼萊國而生已愧中元之句憶宣城之舊吏驚四紀之年會華節之遄歸禱雅詞而下屬雖洛陽耆德不稱擬

倫然履道燕居幸同休退願歌赤壁共揖清風在欣感
以交懷非叙陳之能既

回豐漕壽詩啟

周子充

誦哀父母之詩每感左垂之日讀寡兄弟之禮况當右
拱之時曾未釋於端憂敢與聞於贊喜伏蒙某官嘯枯
意重漱潤才清篤聯事之至情致執謙之善頌既邁吉
甫穆如之作又形仲尼仁者之言申以醪牽重之儀物
敬恭而實兼備於未將正則而均有光於初度其為心

感尚俟面陳

謝許監丞壽詩啟

與予同歲
渠長一月

周子充

庾威雌甲辰敢攀壽雋公瑾小一月適契吾宗過軫高
情曲形盛禮賦兩詩而寵甚及二丙以欣然憶元豐壬
戌之明年有潞公丙午之盛集今幸密隣於几杖阻陪
高會於笑談

論與其子皆丙午
生來詩及二丙

謝人投壽詩啟

朱元晦

年及無聞已負蓬弧之志日臨初度復增我爵之悲誤
辱謙光俯加賁飾顧茲衰朽雖黼黻以何施仰歎瑰奇
用襲歲而為好

回壽詩啟

傅景仁

大塊勞我以生辰之安在君子愛人以德譽乃過情茲
蓋某官惠顧陳人寵光初度寒知松柏儻獲保於後彫
報匪瓊瑤第弗諼於永好

古詩

三星行

韓愈

東坡志林韓退之詩我生之辰月宿南斗
乃知退之磨蝎為身宮僕以磨蝎為命宮
平生多得謗譽殆同病也

我生之辰月宿南斗牛奮其角箕張其口牛不見服箱
斗不挹酒漿箕獨有神靈無時停簸揚無善名以聞無
惡聲以譙名聲相乘除得少失有餘三星各在天什伍
東西陳嗟汝牛與斗汝獨不能神

壽韓平原

陸務觀

珥貂中使傳天語一片飛塵驚輦路清霜粲瓦初作寒
天為明時生帝輔黃金飾奩雕玉觴上尊御食傳恩光
紫駝之峯玄熊掌不數沙上千羣羊通天寶帶連城價
受賜雍容看拜下神皇外孫風骨殊凜凜英姿不容畫
問今何人致太平平地萬里皆春耕身會風雲手扶日
異姓真王功第一

壽叔父致政南極老人歌

楊廷秀

淡溪居士登九齡朱顏綠鬢如後生橫拖仙人綠玉杖
倒誦上帝黃庭經璇霄仙藉書姓名丹霞染誥金花綾
近來更覺雙眼明夜抄蠅頭窓下燈登山臨水兩腳輕
御風騎氣不用行何人有筆筆無塵鵝溪一幅為寫真
烏紗白苧坐鼓琴上有千歲長松青令威旁舞玄夫聽
箇是活底南極老人星

律詩

壽冠相公

魏野

嶽瀆精英氣來鍾積慶門何時生上相明日是中元仙
藥寧無種靈椿別有根佇期三入後一品見玄孫

壽周益公

李商叟

天佑熙朝世產賢承平舊業至今傳萊公少避中元日
潞國同生丙午年翰墨獨傳千古秘聲名嘔在二公先
功成野服平園去要伴靈龜巢碧蓮

又

昨夜微雲槩大清銀河映帶壽星明祥開碧落中元節

人頌昇早上相生天上異恩尊帝傅洛陽好事寫耆英
長身獨樂園中老疑是平園舊弟兄

又

袖中勲業拂雲煙筆底文章擣澗泉已是貴為天下宰
不妨長作地行仙蟻浮玉友秋初熟鵲報銀河月正圓
滿引壽觴今夜看相星重入太微垣

壽詞

水龍吟

蘇子瞻

古來雲海茫茫道山絳闕知何處人間自有赤城居士
龍蟠鳳舉清淨無為坐忘遺照八篇奇語向玉霄東望
蓬萊晝靄有雲駕駿風馭行盡九州四海笑紛紛落花
飛絮臨江一見謫仙風采無言心許八表神遊浩然相
對酒酣真踞待垂天賦就騎鯨路穩約相將去

最高樓壽洪內翰七十 辛幼安

金閨老眉壽正如川七十具華筵樂天詩句香山裏杜
陵酒債曲江邊問何如歌窈窕舞嬋娟更十歲太公方

出將又十歲武公方入相留盛事看明年直須腰下添
金印莫教頭上欠貂蟬向人間長富貴地行仙

沁園春

辛幼安

甲子相高亥首曾疑絳縣老人看長身玉立鶴般風度
方頤鬚磔虎樣精神文爛卿雲詩凌鮑謝筆勢駸駸更
右軍渾餘事羨仙都夢覺金闕名存門前父老忻忻煥
奎閣新褒詔語溫記他年帷幄須依日月只今劔履快
上星辰人道陰功天教多壽看到貂蟬七葉孫君家裏

是幾枝丹桂幾樹靈椿

鵲橋仙

慶岳母八十

辛幼安

八旬慶會人間盛事齊勸一盃春
釀胭脂小字點眉間
猶記得舊時宮樣絳衣更看功名富貴直過太公以上
大家着意記新詞遇着箇十年便唱

詩話

同庚附

縣令生日

開寶中有神泉縣令姓張外施廉潔內極貪黷一日榜

縣門示某月某日知縣生日告示諸色人不得饋送有
曹吏曰宰君明言生日欲我輩知也衆曰然至日各持
縑獻之曰續壽衣宰亦無所拒後又告示曰後月某日
縣君生日仍前不受饋送吏復持縑以獻焉時王崑賦
鷺鷥詩以諷之曰飛來疑是鶴下處却尋魚

獻老子圖

錢穆父尹天府生日楊次公畫老子出關圖作詩以獻
曰秘藏函谷關中子來獻蓬萊閣上仙願得鬚眉如此

老却教龜鶴筭長年

雲齋錄

為同甲會

係同庚

文潞公居洛日年七十八同時中散大夫程珣朝議大夫司馬旦司封郎中致仕席汝言年皆七十八嘗為同甲之會各賦詩潞公詩曰四人三百二十歲況是同生甲午年占得梁園為賦客合成商嶺採芝仙清談疊疊風生席素髮蕭蕭雪滿肩此會從來誠未有洛中應作

畫圖傳

筆談

幼悟

羣書要語幼子常視無誑曲禮孩提之童無不知愛其親

也孟子

詩句覓句新知律攤書解滿床試吟青玉案莫羨白羅

裳

杜示宗武

小兒弄筆不能嗔浣壁書窓且賞勤劉禹錫問來

案上翻墨汁塗抹詩書似老鴉盧仝少長聚嬉戲不殊同

隊魚

韓愈

古今事實

生而岐嶷

后稷生於姜嫄實覃

始能坐

實訐

張

厥聲載路克岐

克人

嶷

識人意

以就口實

戲陳俎豆

孔子為兒嬉戲常戲陳俎豆禮容

史記

孟子事見教子門

互鄉潔已

互鄉難與言童子見門人惑子曰與其進也不與其退

也唯何甚人潔已以進與其潔也不保其往也

述而

闕黨童子將命

闕黨童子將命或問之曰益者與子曰吾見其居於位也見其與先生並行也非求益者也欲速成者也憲問

羈貫成童

谷梁云子生羈貫成童不就師父之罪也羈貫謂交午剪髮也

與我玄文

見年齒門

果取小者

孔融兄弟七人嘗共食棗曰我小兒法當取小者

對日遠近

晉明帝數歲元帝抱置膝前屬長安使來因問汝謂日與長安孰遠對曰長安近不聞人從日邊來居然可知也元帝異之明日宴羣僚又問之對曰日近元帝失色曰何乃異間者之言對曰舉目見日不見長安由是益奇之

一座盡驚

王粲字仲宣蔡邕見而奇之時邕才學顯著貴重朝廷
車騎填門賓客盈座聞粲在門倒屣迎之既至年初容
狀短小一座盡驚

龍駒鳳雛

陸機陸雲幼時吳尚書廣陵閔鴻見而奇之曰此兒若
非龍駒當是鳳雛

本傳

戲知優劣

王僧虔父曇首與兄弟會集子孫任其戲適僧達跳下

地作彪子時僧虔累十二博碁既不墜落亦不再作僧
綽採蠟燭珠為鳳凰僧達奪取打壞亦復不惜伯父弘
嘆曰僧達俊爽當不減人然亡吾家者終此子也僧虔
必至公卿僧綽或以名義見美或云僧虔採燭珠為鳳
弘稱其長者

因戲見志

見桑門

戲為營陣

趙犢兒弄時好為營陣行列自號令指顧羣兒無敢亂

父叔文見之曰是當大吾門

以船秤象

魏鄧哀王冲字倉舒武帝子也孫權致大象太祖欲知其斤重倉舒曰置象大船之上刻其水水痕所至稱物載之則較可知矣太祖大悅即施行之

弱不好弄

傅夷吾弱不好弄弱幼弄戲也 王潜幼莊重不喜兒

弄

江夏黃童

黃香幼岐嶷人語曰天下無雙江夏黃童

呼為小友

張九齡與嚴挺之蕭誠善嚴勁而蕭佞九齡方命左右
召蕭李泌號為奇童在旁率爾曰公起布衣以直道至
宰相而喜軟美者乎九齡驚改容謝之因呼小友

蘭茁其芽

馬燧幼子娟好靜秀瑤環瑜珥蘭茁其芽

韓作墓志

擊甕活兒

司馬溫公童稚時與羣兒戲於庭庭有大甕一兒登之
足跌沒水中羣兒棄去公以石擊甕水因穴而迸兒得
不死其活人手段已見齟齬中至今京洛間多為小兒

擊甕圖

冷齋
夜話

水灌出毬

文潞公少時與羣兒擊毬毬入樹穴中不能取以水灌
得毬出識者知其不几

執帽不濡

杜祁公行父早卒遺腹生其祖愛之幼時祖父脫帽使公執之會山水暴至家人散走其姑投一竿與之使挾以自泛公一手執帽漂流久之得免而帽竟不濡記聞

古今文集

古詩

徐卿二子歌

杜甫

君不見徐卿二子生絕奇感應吉夢相追隨孔子釋氏

親抱送並是天上麒麟兒
大兒九齡色清澈秋水為神
玉為骨小兒五歲氣食牛滿堂賓客皆回頭吾知徐公
百不憂積善衮衮生公侯丈夫生兒有如此二雛者名
位豈肯卑微休

詩話

數歲不言

楊文公億數歲不能言一日家人抱登樓偶觸其首便能語遂吟詩云危樓高百尺手可摘星辰不敢高聲語

恐驚天上人

老

羣書要語尚猷詢茲黃髮則罔所愆番番良士旅力既
愆我尚有之秦石蜡曰老夫耄矣無能為也隱四余髮如

此種種余奚能為上同諺所謂老將至而耄及之昭元班白

者不負戴於道路孟老冉冉其將至兮恐脩名之不立

詞楚黃髮為元龜邊遊黃髮兒齒閩黃耆台背行蒿項黃

馘列子龐眉鶴髮柳頭童齒豁韓文鶴髮難皮庾信竹始見

二毛

潘岳賦

桑榆之景理無遠照選日薄西山氣息奄奄

李表見我龍鍾故相戲耳

裴度傳

崦嵫暮景

歐文

詩句少壯不努力老大徒傷悲選衰鬢霜供白愁顏酒

借紅

鄭谷

白髮千莖雪丹心一寸灰

杜

垂白馮唐老杜白

首壯心違

杜

龍鍾二千石

嚴武

古今事實

老人擊壤

帝堯之時有老人擊壤於路曰吾日出而作日入而息

鑿井而飲耕田而食帝何力於我哉

通歷

天下大老

孟子曰伯夷避紂居北海之濱聞文王作興曰盍歸乎
來吾聞西伯善養老者太公避紂居東海之濱聞文王
作興曰盍歸乎來吾聞西伯善養老者二老者天下之
大老也

之武老矣

晉侯秦伯圍鄭佚之狐言於鄭伯曰國危矣若使燭之

武見秦君師必退公從之辭曰臣之壯也猶不如人今老矣無能為也已公曰吾不能早用子今急而求子是寡人之過也遂見秦伯云云秦伯說與鄭人盟

襄三十

楚丘何老

楚丘先生行年七十披裘帶索見孟嘗君君曰先生老矣春秋高矣多遺忘矣何以教之楚丘曰噫將使我追車而赴馬乎投石而超距乎逐麋鹿而搏虎豹乎吾已死矣何暇老矣將使我出正詞而當諸侯乎決嫌疑而

定猶豫乎吾始壯矣何老之有

新序

廉頗遺矢

廉頗既老飯斗米肉十斤被甲上馬以示可用趙使郭
開曰廉將軍雖老尚善飯然與臣坐頃時三遺矢矣

王翦何怯

秦始皇謂王翦曰將軍老矣何怯也

馮唐為郎

馮唐以老為郎文帝輦過問曰父老何自為郎注謂從

何處來為郎

顏駟不遇

顏駟漢文帝時為郎至武帝輦過郎署見駟龐眉皓髮上問曰叟何時為郎何其老也答曰臣文帝時為郎文帝好文而臣好武至景帝好美而臣貌醜陛下好少而臣已老是以三世不遇上擢拜會稽都尉

扶杖聽詔

見詔門

主父逆施

主父偃上書召見武帝拜郎中歲中四遷至中大夫公卿皆畏其口賂遺累千金或說偃曰大橫偃曰臣結髮游學四十年身不得遂親不以為子昆弟不收賓客棄我我阨日久矣大丈夫生不五鼎食死則五鼎烹耳吾日暮故倒行而逆施之

充國上圖

馬援雙鑠

並見年齒門

生入玉關

班超自以久在絕域年老思土上疏曰太公封齊五世
葬周狐死首丘代馬依風夫周齊同在中土千里之間
况於遠處絕域小臣能無首丘依風之思哉臣不敢望
到酒泉郡但願生入玉門闕帝乃徵還

高允墜車

後魏高允年漸期頤志識無損孝文以為光祿大夫其
年有事西郊詔御馬車迎允就觀馬忽驚奔車覆傷眉
帝遣醫療護司鑒將處重坐允啟無恙乞免其罪先是

命中黃門蘇興壽扶持允魯雪中遇犬驚倒扶者大懼
允慰勉之不上聞

喬琳耳聾

唐喬琳衰老耳聾上或時訪問應對失次

公然一婆

有一郎官年老買媵妾數人鬚白令妻妾互鑷之妻忌
其少為羣妾所悅乃去其黑者妾欲其少乃去其白者
未幾頤頰遂空又進士李居仁盡摘白鬚其友驚曰昔

則瞠然一翁今則公然一婆

遜齋
閒覽

古今文集

雜著

老而貪功

以功名為心貪軍旅之寄此自將帥習氣雖古來賢卿大夫未有能知止自斂者也廉頗既老飯斗米肉十斤披甲上馬以示可用致困郭開之口終不得召漢武帝大擊匈奴李廣數自請行上以為老不許良久乃許之

卒有東道失軍之罪宣帝時先零羌反趙充國年七十
餘上老之使丙吉問誰可將曰亡踰於老臣者矣即馳
至金城圖上方畧雖全師制勝而禍及其子邛光武時
五溪蠻夷畔馬援請行帝愍其老未許援自請曰臣尚
能被甲上馬帝令試之援據鞍顧盼以示可用帝曰矍
鑠哉是翁也遂用為將果有壺頭之厄李靖為相以足
疾就第會吐谷渾寇邊即往見房喬曰吾雖老尚堪一
行既平其國而有高甑生誣罔之事幾於不免太宗將

伐遼召入謂曰高麗未服公亦有意乎對曰今疾雖衰
陛下誠不棄病且瘳矣帝憫其老不許郭子儀年八十
餘猶為關內副元帥朔方河中節度不求退身竟為德
宗冊罷此諸公皆人傑也猶不免此况其下者乎

容齋
隨筆

福榮堂記

楊廷秀

紹熙五年慈隆備福皇太后聖壽八十廼春王三朝皇
帝鳴和鑾備法駕冒爽夙興星陳天行朝於慈福宮奉
觴上千萬歲壽是日壽皇拜前皇帝拜後嘉王又拜後

四世重慶三宮驩洽怡愉如也縉禮告竣慈顏有
喜皇帝若曰有昊博臨克篤宋祐佑我王母受茲介福
施及家邦予一人敢專嚮之其錫類介賚以及人老惟
臣若士若民父母高年者賜爵有差於是太學生員吉
州太和縣進士胡箋父臣詔封迪功郎致仕母歐陽氏
孺人贊書罷嘉命服淵耀邑里交賀族親相艷乃扁其
中堂命曰福榮以侈君賜取諸贊書語也維吉之胡其
先肇自五季避地寔來其別有三若資政殿學士忠簡

公是為值夏之胡其祖伯也若諱衍策慶厯六年第仕
至朝奉大夫者是為大和南城之胡其祖仲也若箋之
父子是為黃漕之胡其祖季也伏而未騫汨而未昭其
騫其昭不在箋乎惟諮里居有賢稱嗜義若渴教子若
琢切而箋也允迪其教用勵其業將以樹其家而亢其
宗與九州四海之豪英角其能於上庠而屢書于月成
焉繫皇上錫類之恩配于丕天曷云報將欲報稱不在
移所以孝於親者以忠於君乎君家資政忠簡大忠高

節動天地貫日月也師之則是學之則至其勿曰吾家
子雲而外求焉則幾矣豈惟報其君亦惟報其親三月
既望記

古詩

榮木

陶潛

榮木念將老也日月推遷已復有夏總角聞道白首無
成采采榮木結根于茲晨耀其華夕已喪之靜言孔
念中心悵而采采榮木于茲託根繁華朝起慨暮不存

貞脆由人禍福無門匪道曷依匪善奚敦嗟余小子稟
茲固陋徂年既流業不增舊志彼不捨安此日富我之
懷矣怛焉內疚先師遺訓余豈云墜四十無聞斯不足
畏脂我名車策我名驥千里雖遙孰敢不至

浩歌行

白居易

天長地久無終畢昨夜今朝又明日鬢髮蒼浪牙齒疎
不覺身年四十七前去五十有幾年把鏡照面心茫然
既無長繩繫白日又無大藥駐朱顏朱顏日夜不如故

青史功名在何處欲留年少待富貴富貴不來年少去
去復去兮如長河東流赴海無迴波賢愚貴賤同歸盡
北邙塚墓高嵯峨古來如此非獨我未死有酒且高歌
顏回短命伯夷餓我今所得亦已多功名富貴須待命
命若不來知奈何

有所思

宋之問

洛陽城東桃李花飛來飛去落誰家幽閨兒女惜顏色
坐見落花長嘆息今年花落顏色改明年花開復誰在

已見松柏摧為薪更聞桑田變成海古人無復洛城東
今人還對落花風年年歲歲花相似歲歲年年人不同
寄言全盛紅顏子須憐半謝白頭翁此翁白頭真可憐
伊昔紅顏美少年公子王孫芳樹下清歌妙舞落花前
光祿池臺文錦繡將軍樓閣畫神仙一朝卧病無人識
三春行樂在誰邊宛轉蛾眉能幾時須臾鶴髮亂如絲
但看古來歌舞地惟有黃昏鳥雀飛

老去也

薛逢

惆悵人生不滿百一事無成頭雪白迴看幼累與老妻
俱是塗中遠行客匣中舊鏡照膽明昔曾鑒我髭未生
朝中暮櫛不自省老皮皺皺文縱橫合掌髻子蒜許大
此日方知非是我暗數七旬能幾何不覺中腸熱如火
老去也爭奈何敲酒盞唱短歌短歌未竟日已沒月映
西南庭樹柯

短歌行

張籍

青天蕩蕩高且虛上有白日無根株流光暫出還入地

使我年少不須臾與君相逢勿寂寞衰老不復如今樂
玉卮盛酒置君前再拜願君千萬年

律詩

村南逢病叟

耿漳

雙膝過頤頂在肩四鄰知姓不知年卧驅烏雀惜禾黍
尤恐諸孫無社錢

代鄰叟

竇羣

年來七十罷耕桑就暖支羸强下床滿眼兒孫身外事

間梳白髮向斜陽

古今事文類聚前集卷四十四

欽定四庫全書

古今事文類聚前集卷四十五

宋 祝穆 撰

樂生部

壽

羣書要語五福一曰壽

洪範

為此春酒以介眉壽

七月

如南

山之壽如松栢之茂

天保

三壽作朋如岡如陵

閔宮

永錫難

老水仁者壽

語四

年彌高而德彌邵

楊子

人上壽百歲中壽

八十下壽六十除病瘦死喪憂患其中開口而笑者一

月之間不過三四日而已耳盜跖緣督以為經可以全生

可以盡年注緣督中經常也養生是謂長生久視之道

老子一岐一世之民躋仁壽之域王吉傳狼北地有大星曰南

極老人見則治平主壽昌天文志龜千年乃游於蓮葉之

上鶴千歲乃投於偃蓋之松史記大椿蟠桃見聖壽門

詩句八荒開壽域杜

古今事實

廣成子千二百歲

廣成子曰無勞爾形無搖爾精乃可以長生故我脩身
千二百歲形未嘗衰

彭祖歷三代

彭祖堯臣封於彭城歷虞夏至商年七百歲故以久壽

聞迹而注

千歲眉壽

閔宮頌僖公俾爾昌而大俾爾耆而艾萬有千歲眉壽

無有害天錫公純嘏眉壽保魯居常與許復周公之
宇魯侯燕喜令妻壽母宜大夫庶士邦國是有既多受
祉黃髮兒齒

老子二百餘歲

老子二百餘歲以其脩道而養壽也

色若孺子

南作子葵問女偶曰子之年長矣而色若孺子曰吾聞

道矣莊子

摩銅狄人

後漢蓊子訓與一老翁共摩掌銅狄人相謂曰適見鑄此物而已近五百歲

吞氣九千歲

東方朔元封中游鴻蒙之澤忽遇老母采桑於白海之濱俄而有黃眉翁指母以語朔曰昔為吾妻託形於太白之精今汝亦此精也吾却食吞氣已九千餘歲目中瞳子皆有青光能見幽隱之物三千年一返骨洗髓三

千年一剥皮伐毛吾生來已三洗髓一伐毛矣

龜息必壽

唐袁天綱李嶠同宿袁聽嶠息在耳中賀曰郎君貴壽此龜息也

香山九老

白居易暮節惑浮屠至經月不食葷稱香山居士常與胡杲等燕樂皆高年不仕者人慕之繪為九老圖

至道九老

李文正公昉罷相後只居京師以司空致仕至道元年
七十一矣思白樂天洛中九老之會且交游中有此數
曰太子中允張好問年八十五太常少卿李運年八十
故相吏部尚書宋琪廬州節度副使武允成皆年七十
九吳僧贊寧年七十八郢州刺史魏石年七十六諫議
大夫楊徽之年七十五水部郎中朱昂與昉皆七十一
欲繼其事為宴集會蜀寇起而罷其中兩宰相乃着一
僧唐世及元豐耆英所無也次年李公即世此事竟不

成耄老康寧相與燕嬉於升平之世而雅懷非遂造物

豈亦各此耶

容齋
隨筆

洛陽耆英

元豐五年文潞公以太尉留守西都時富韓公以司徒致仕潞公慕唐白樂天九老會乃集洛中公卿大夫年德高者為耆英會以洛中風俗尚齒不尚官就資聖院建大廈曰耆英堂命閩人鄭真繪像堂中共十三人詩見後于時宣徽使王拱辰留守北京貽書潞公願與其會年

七十一獨司馬溫公年未七十潞公素重其人用唐九
老狄蕪蓼故事請入會溫公辭以晚進不敢班文富二
公之後潞公不從令鄭真自幕後傳溫公像又之北京
傳王公像於是預其會者凡十五人潞公以地主携鼓
樂就富公宅作第一會至富公會送羊酒不出餘皆次
為會洛陽多名園古剎有水竹林亭之勝諸老鬚眉皓
白衣冠甚偉每宴集都人隨觀之潞公又為同甲會司
馬郎中旦程太中珣席司封汝言皆丙午也詩見同
庚門亦

繪像於資聖院其後司馬溫公與數公又為真率會

詩見

于後

有約酒不過五行食不過五味唯菜無限楚正議違

約增飲食之數罰一會皆洛陽太平盛事也洛之士庶

又生祠潞公於資聖院溫公取神宗送公判河南詩隸

于榜曰竚瞻堂塑公像其中冠劍偉然都人事之甚肅

聞見錄

貴而且壽

張退傅文懿士遜趙少保叔平槩張樞相昇皆壽八十

六陳丞相文惠堯佐壽八十二杜丞相正獻衍壽八十
一富丞相文忠弼壽八十五贈致政退傳詩曰青雲岐
路遊將徧白髮光陰得最多

青箱
雜記

飲菊水

東坡云舊說南陽有菊水水甘而芳居民三十餘家飲
其水皆壽或至百二三十歲蜀青城山老人村有見五
世孫者道路嶮遠生不識鹽醯而溪中多枸杞根如龍
蛇飲其水故壽近歲道稍通漸能致五味而壽亦益衰

古今文集

雜著

壽域碑

王元之

古聖人之營壽域也非土木非版築不金乎城不湯乎池畫無鍵而闕夜無柝而擊東西不吾戎夷南北不吾蠻狄五嶽其雉堞四溟其溝洫天地離合我其扁鵲春秋啓閉我其門戶入是域也幼者蚩蚩壯者怡怡老者熙熙悉無中絕咸躋上壽故謂之壽域焉得非道為土

木德為版築仁乎城義乎池慈乎雉堞愛乎溝洫恭乎
局鐫儉乎門戶使風雨不能毀矢石不能攻高低侔老
氏之臺廣狹法華胥之國崇崇焉屹屹焉信善建而不
拔者也洎霸道既昌皇風不競則必灑法令為風雨以
驅之興賦役為矢石以攻之壽域之基忽焉委地於戲
域之壞也若民命何于是賤穀帛費金玉盜賊蠭起敷
斂角張刑巢蔽空憲網絡野壽域之民有以法而死者
開拓疆場肆放侵伐鋒鏑霜瑩卒乘鱗集蛟吞鼓頽蠶

食張吻壽域之民有以兵而死者煙蒸霧障發厲成妖
壽域之民有以天而死者山魃搏人水蟲射影壽域之
民有以橫而死者王者患民之無壽也舉引年之典行
養老之禮乞言於東序展禮於南庠又謂老者非帛不
煖於是乎錫之以几杖斯亦得其末而失其本矣殊不知
民之壽夭繫君之政教其猶影響爾其或捐金于山
沉珠于泉禁不急之務棄難得之貨君德尚儉人心返
淳則無法死者矣干羽舞階戈矛倒載謹不祥之器崇

止敵之基我國無外斯民不爭則無兵死者矣燮和律
厯端正節候舉授時之典興除害之利五穀豐順兆人
克寧則無夭死者矣貢金于遠方鑄鼎于中夏示不實
之物免逢旃之患彼怪斯露厥人用康則無橫死者矣
夫如是則域不築而自成人不憂而自壽矣今我后道
德慈愛行之於上法兵天橫絕之於下游游乎蕩蕩乎
見壽域復成於今世某亦壽域中之一民耳知我帝力
得無述焉碑者悲也悲域之中廢頌域之再興也其辭

曰古之域築道樹德民欲天兮安得後之域基奸址賊
民欲壽兮不獲我聖人兮復于古昔

古詩

唐九老詩并序

白居易

會昌五年三月二十四日胡吉劉鄭盧張等六賢皆多
年壽予亦次焉於東都敝居履道坊合尚齒之會七老
相顧既醉且歡靜而思之此會希有因各賦七言韻詩
一章以記之或傳諸好事者其年夏又有二老年貌絕

倫同歸故鄉亦來斯會續命貫姓名年齒寫其形貌附
于圖右仍以一絕贈之云雪作鬚眉雲作衣遼東華表
鶴雙歸當時一鶴猶希有何況今逢兩令威
洛中二老李元興年
滿歸洛年九十五
一百三十六禪僧如
又云時秘書狄兼謨河南尹盧貞
以年未及七十雖與會而不及列

前懷州司馬安定胡杲年八十九

閒居同會在三春大抵愚年最出羣霜鬢不嫌盃酒興
白頭仍愛玉爐熏徘徊玩柳心尤健老大看花意却勤

鑿落滿斟撩醕酌香囊高掛任氤氲搜神得句題紅紙
望景長吟對白雲今日交情何不替齊年同事聖明君
衛尉卿致仕馮翊吉叟年八十八

休官罷任已閒居林苑園亭興有餘對酒最宜花藻發
邀歡不厭柳條舒低腰醉舞垂緋袖擊筋謳歌任褐裾
寧用管絃來合雜自親松竹且清虛飛觥酒到須先酌
賦韻詩成不住書借得商山賢四皓不知此後更何如

前磁州刺史廣平劉真年八十七

垂絲今日幸同筵
朱紫居身是大年
賞景當知心未退
吟詩猶覺力完全
閒庭飲酒當三月
在席權豪衆七賢
山茗煮時秋霧碧
玉盃斟處彩霞鮮
臨堦花笑如歌妓
傍竹松聲當管絃
雖未學窮生死訣
人間豈不是神仙

前龍武軍長史滎陽鄭據年八十五

東閣幽閒日暮春
邀懽皆是白頭賓
官班朱紫多相似
年紀高低次第勻
聯句每言松竹意
停盃多說古今人
更無外事來心肺
空有清虛入鬼神
醉舞兩迴迎勸酒

狂歌一曲會余身今朝何事偏情重同作明時列任臣
前侍御史內供奉官范陽盧真年八十三

三春已盡洛陽宮天氣初晴景象中千朵嫩桃迎曉日
萬株垂柳逐和風非論官位皆相似及至年高已共同
對酒歌聲猶覺妙玩花詩思可能窮先時共作三朝貴
今日猶逢七老翁但把綠醪常滿酌煙霞萬里會應通

前永州刺史清河張渾年七十七

幽亭春盡共為歡印綬居身是大官遁跡豈勞登遠岫

垂絲何必坐溪碕詩聯六韻尤應易酒飲三盃未覺難
每況襟懷同宴會共將心事比波瀾風吹野柳懸羅帶
日照庭花落綺紉此席不煩鋪錦帳斯筵堪作畫圖看

刑部尚書致仕白居易年七十四

七人五百八十四拖紫紆朱垂白鬚囊裏無金莫嗟嘆
樽中有酒且歡娛吟成六韻神還旺飲到三盃氣尚粗
嵬峩狂歌教婢拍婆娑醉舞遣孫扶天年高邁二疎傳
人數多於四皓圖除却三山五天竺人間此會且應無

睢陽五老圖詩并序

錢明逸

夫蹈榮名而保終吉都貴勢而躋遐耆白首一節人生
所難今致政宮師相國杜公雅度敏識圭璋巖廟清德
令望龜準當世功成自引得謝君門視所難得者則安
享之謂所難行者則恬居之燕申睢陽與賓客太原王
公故衛尉河東畢卿兵部沛國朱公駕部始平馮公咸
以耆年掛冠優游鄉梓暇日宴集為五老會賦詩酬唱
怡然相得宋人形于繪事以紀其盛昔唐白樂天居洛

陽為九老會于今圖識相傳以為勝事距茲數百載無
能紹者以今况昔則休烈鉅美過之明逸游公之門久
矣以鄉閭世契倍厚常品今假手留鑰日登翹館因得
圖像占述序引以代鄉校詠謠之萬一至和丙申中秋
日錢明逸序

太子太師致仕祁國公杜衍八十歲

五人四百有餘歲俱稱分曹與掛冠天地至仁難補報
林泉幽致許盤桓花朝月夕隨時樂雪鬢霜髯滿坐寒

若也睢陽為故事何妨列向畫圖看

禮部侍郎致仕王渙九十歲

分曹歸政養耆年李下何由更正冠賢相賦詩同嘯傲
聖君優詔去盤桓龐眉老叟俱稱壽凌雪喬松豈畏寒
屈指五人齊五福鄉人須作二疏看

司農卿致仕畢世長九十四歲

非才最忝預高年分務由來近掛冠敢造鉅賢論軌躅
幸依都府得盤桓篇章捧和慙風雅眷待優隆荷歲寒

倘許衰容參盛列願憑繪事永傳看

兵部郎中致仕朱貫八十八歲

各還朝政遇堯年鶴髮俱宜頂道冠乍到林泉能放曠
全拋簪紱尚盤桓君恩至重如天覆相坐時親畏地寒
九老且無元老貴莫將西雒一般看

駕部郎中致仕馮平八十七歲

詔恩分務許優閒肯借留都獬豸冠名宦儻來空擾攘
丘園歸去好盤桓醉遊春圃煙霞暖吟聽秋潭水石寒

退傅况兼為隱伴紅塵那復舉頭看

謝借觀五老詩

歐陽脩

脫游軒冕就安閒笑傲丘園縱倒冠
白髮憂民雖種種丹心許國尚桓桓
冥鴻得路高難慕松老無風韻自寒
閒說優游多唱和新篇何惜盡傳看

耆英會序

司馬光

昔白樂天在洛與高年者八人游時人慕之圖傳於世
宋興洛中諸公繼而為之者再矣皆圖形普明僧舍樂

天之故第也元豐中潞國文公留守西都韓國富公致政在里第皆自逸於洛者潞國謂韓國公曰凡所為慕於樂天者以其志趣高逸也奚必文與地之襲焉一日悉集士大夫老而賢者於韓公之第買酒相樂賓主凡十有二人圖形妙覺僧舍時人謂之洛陽耆英會孔子曰好賢如緇衣取其敝又改為樂善無厭也二公寅亮三朝為國元老入贊萬機出綏四方上則固社稷尊宗廟下則熙百工和萬民為天子腹心股肱耳目天下所

取安所取乎其勲業闕大顯融豈樂天所能庶幾然猶慕效樂天所為汲汲如恐不及豈非樂善無厭者歟又洛中舊俗燕私相聚尚齒不尚官自樂天之會已然是日復行之斯乃風化之本可頌也宣徽王公方留守北都聞之以書請於潞公曰亦家洛位與年不居數客之後顧以官守不得執卮酒在坐席良以為恨願寓名其間幸無我過其為諸公嘉美如此光未七十用狄監盧尹故事亦預於會潞公命光序其事光不敢辭時元豐

五年正月端明殿學士兼翰林侍讀學士大中大夫提
舉崇福宮司馬光序

武寧軍節度使守司徒開府儀同三司致仕
韓國公富弼彥國年七十九

伏承留府太尉相公就敝居為耆年之會承
命賦詩謹錄上呈伏惟采覽

西洛古帝都衣冠走集地豈惟名利場驟為耆德會大
尹吾舊相曠懷輕富貴日與退老遊臺閣并省寺予慚

最衰老亦許預其次遂欲肖儀容爛然形繪事閩嶠訪
精筆蛟綃布絕藝今復崇宴衍聊以示慈惠幽居近銅
駝荒敞仍湫底塞路移君庖盈車載春醴獻酬互相趣
歡處不知止商嶺有四翁晉林惟七子較我集諸賢盛
衰何遠爾並事實可矜傳之為千祀

河東節度使守太尉開府儀同三司判河南
府潞國公文彥博寬夫年七十七

九老舊賢形繪事元豐今勝會昌春垂肩素髮皆時彥

揮麈清談盡席珍染翰不停詩思健飛觴無筭酒行頻
蘭亭雅集誇脩禊洛社英游賞序賓自愧空疎陪几杖
更容欵密奉簪紳當筵尚齒尤多幸十二人中第二人
弼竊覽長篇斷章有十二人中第二人之句
又賦一絕上呈

顧我年齡雖第一在公勲德自無雙不推行業終難敵
富貴康寧亦可將

彥博伏覩公詩有第一無雙之句輒成二十

八字上呈

洛下衣冠今最盛
當筵尚齒禮容優
惟公福壽并勲德
合是人間第一流

尚書司封郎中致仕席汝言君從年七十七
繫國安危唐上宰
功成身退漢留侯
二公閒暇開高宴
九老雍容奉勝流
共接雅歡恩意洽
不矜崇貴禮容優
賞心樂事人間盛
豈謂今稀古莫儔

又

壯歲塵埃祿仕牽老歸重到舊林泉曾無勲業書青史
偶向康寧養老年自分杜門居陋巷敢期序齒預公筵
更慚形穢才涼薄不稱圖真接鉅賢

朝議大夫致仕王尚恭安之年七十六

端朝風望兩台星珪組參差又十人八百喬年餘總數
一千熙運遇良辰席間韻語皆非俗圖上形容盡得真
勝事主盟開府盛誤容衰薄混清塵服許便衣更野逸
坐從齒列似天倫二公笑語增和氣夜久盤花旋發春

燭下盤花盛開
公即指目焉

太常少卿致仕趙丙南正年七十五

新春鼎洛燕英髦主禮雍容下庶寮二相比肩官一品
十人華髮事三朝星階並列瞻台耀樽酒時行挹斗杓
東顧庸夫最無狀也將顏面趁嘉招

秘書監致仕上柱國劉几伯壽年七十五

司徒碩德今無比太尉殊勲固絕倫偶以莫年陪盛宴
喜將白髮照青春八公穢有山空著四皓當衰志且伸

元老相望跡在不應此會愧前人

又

制舉省元推二相龍頭昔日屬宣猷人間盛事并遐算

一席幾盈九百筭

十二老共八百九十二歲

衛州防禦使致仕馮行已肅之年七十五

書稱五福壽為先有德人方得壽延自愧櫟枏非遠器
惟應齒髮亦遐年立身官未三公貴推老名陪二相賢
喜把衰容模梵宇慙無纖効勒燕然當時遭遇承陶冶

今日光榮預燕筵從此洛城增勝槩又新重作畫圖傳
中奉大夫充天章閣待制提舉崇福宮建

中正叔年七十二

自顧頽齡七十餘久慚頽鉅費洪鑪歸逢大老耆年會
衰朽形骸愧畫圖

又

二相謨猷爛史編諸公才業過前賢好圖儀像傳來世
何事頽踈亦比肩

司農少卿致仕王謹言不疑年七十二

相印貂冠粲六符華顛高會侍臣俱不將官職誇鄉里
惟尚年齡入畫圖履道清歡追故事竚瞻陰德見訐謨
叨陪几杖真榮觀珪璧叢中間珽珽

宣徽南院使檢校太尉判大名府王拱辰君

貺年七十一

西都山水天下奇神嵩景室環清伊

上古太室山
為景室山

甫申

間氣秀不絕生賢會聖昌明時衣冠占數盛文雅台符

卿月光離離魏京雄奧壓幽朔遊宮御府嚴天威膏田
千里翳桑柘犀甲萬旅馴熊羆公當緩帶名三鎮懸赤
繼軫承保釐追推契遇最深舊加復雍孟交旌麾仁皇
一在龍虎榜桂堂先後攀高枝宦遊出處五十載鸞臺
驥路俱騰夷三公極位固遼隔五年以長猶肩隨公今
復主鳳門鑰僕亦再撫銅臺圻二京相望阻河廣三徑
不克陪遊嬉忽聞幹步踵門至投我十二耆英詩整冠
肅貌諷章句若坐寶肆羅珠璣為言白傳有高躅九君

結社真可師欲令千載著風迹亟就僧館圖神姿詞宗
端殿序篇目滂灑大筆何淋漓眷言履道靡充詘菟裘
近邑將營歸取云綸素得精筆願列霜壁如唐規退居
舊相國元老十年還政瀝之涯康寧富貴備五福靈寶
盛氣如虹霓昔年大對繼晁董登科賜第同一暮皆天聖八年
年紫垣步武既通接金沙里閑還鄰比探禪論道劇訓
對摩軋太古窮天機二賢勲業冠朝省爵齒官學誰依
稀今將圖畫表來世詎可下客聯纓綈既蒙月品定人

物不敢循避違風期况承開閣厚賓客富有景物佳園
池銅駝坊西福善宅脩竹萬箇籠清漪天光臺高未百
尺下眺林嶺如屏帷花王千品盡殊勝風光繡畫三春
暉六相街中路公第碧瓦萬木煙參差左隅廟室本經
禮右閣宸翰尊星奎婆娑青鳳舞松柏煥爛素錦薰醑
醪石渠飛溜漱寒玉晝夜竽瑟鳴堦墀伊予陋宇治窮
僻姑喜地廣為環溪樓名多景可曠望臺號風月延清
輝四時花蘊不外假拏舟傲憤聊嬉怡懷歸撫事若饑

渴恨無羽翼西南飛人生交舊貴倫輩情親意接心相
知豈無晚秀肩才蘊高談大笑拘禮儀洛中故事名義
燕二毛第一年相推濯冠登仕荷天寵尊君報國當百
為既嗟大耋盡知止納祿謝事皆所宜顧方比道倚煩
劇未許解紱披荷衣長篇不令負花約公貽莫負花
前約之句為
指風什歌式微如羹甘露爽心骨似柄玉塵親顏眉蘭
蕞雖未長羅宅菊英似亦思陶籬子山已著小園賦彥
倫猶愧鍾山移聊攄短引謝招隱肯使猿鶴常驚啼

大中大夫提舉崇福宮張問昌言年七十

槐庭二老樂堯仁
盛集高年洛水濱
華袞具瞻雖禮絕
白頭序齒却情親
清閒几席同禪院
山野巾裘似隱淪
尊酒椒香纔過節
池塘草色已催春
白公酣暢吟哦內
衛武康強笑語頻
豈獨丹青傳不朽
潛欣風俗欲還淳
芝田鶴戲調形健
蓮葉龜游納息勻
商皓寒寥拘小隱
漢疎局促止家人
莫因氣貌疑丹竈
自有光陰寄大椿
復得兼謨為重客

司馬光
未七十

恐遺元爽在
編民神仙可學

今方信道術相忘久益真滿座交歡祝眉壽羣生五福
託鴻鈞

龍圖閣直學士通議大夫提舉崇福宮張壽
景元年七十

洛城今昔衣冠盛韓國園林景物全功在三朝尊二相
數踰九老萃羣賢當時鄉社為高會此日居留許款延
多幸不才陪履烏更慚七十是新年

彥博代簡上君貺宣猷

勿愛大名名遂忘西洛樂銅駝本自佳金鳳亦不惡二
月三月春融融千花萬花紅灼灼公乎早歸來莫負花
前約同賞狀元紅對酒劉師閣

花雖舊房
其艷維新

端明殿學士兼翰林侍讀學士大中大夫司

馬光年六十四

洛下衣冠愛惜春相從小飲任天真隨家所有自可樂
為具雖微誰笑貧不待珍羞方下筯只將佳景便娛賓
庾公此興知非淺藜藿終難作主人

會約

序齒不序官為具務簡素朝夕食各不過五味菜米脯
醢之類各不過三十器酒巡無筭深淺自斟主人不勸
客亦不辭逐巡無下酒時作菜羹不禁召客共用一簡
客注可否於字下不別作簡或因事分簡者聽會日早
赴不待促違約者每事罰一巨觥

四月

日押

作真率會伯康與君從七十八歲安之七十

七歲正叔七十四歲不疑七十三歲叔達七
十歲光六十五歲合五百一十歲口號成詩

用安之前韻

司馬光

七人五百有餘歲同醉花前今古稀走馬聞雞非我事
紵衣絲髮且相輝

又

經春無事連翩醉彼此往來能幾家切莫辭斟十分酒
儘從他笑滿頭花



古今事文類聚前集卷四十五